

Dumonda Cavegn concernent il basegn supplementar da personal per cumbatter cunter la cybercriminalitad

La regenza ha proclamà en ses rapport davart il program da la regenza ed il plan da finanzas per ils onns 2017 – 2020 (missiva carnet nr. 12 / 2015 – 2016) en il champ d'acziun 6 la garanzia da la segirezza publica e sociala e fixà en l'intenziun strategica che la polizia chantunala saja pronta per cumbatter cunter la cybercriminalitad e per las pretensiuns pli grondas envers ina registraziun ed evaluaziun da las cumprovas complessiva tenor la lescha davart la procedura penala. En il punct central da svilup 4'22 che concretisescha quai, èsi vegnì fixà ch'ils servetschs per la tecnica criminala, la tecnologia d'infurmaziun (TI) e l'investigaziun digitala stoppian vegnir adattads a las pretensiuns pertutgant la cybercriminalitad.

Perquai che adina dapli delicts hajan ina relaziun cun ils meds da communicaziun moderns (sextorsiun, engion online, extorsiun via e-mail, enguladitsch da datas, phishing e.u.v.), ha la polizia chantunala dal Grischun communitgà la primavaira 2017 ch'ella veglia augmentar las resursas materialas e personalas en il sector da la forensica digitala, da la cyberinvestigaziun e da la cyberanalisa, e che questa amplificaziun possia vegnir terminada anc durant l'onn 2017.

L'amplificaziun dal cumbat cunter la cybercriminalitad vegn beneventada. Ma segiramain è ella fitg intensiva areguard il personal. Per l'autra pretendan er las pretensiuns pli grondas envers la polizia chantunala custs da personal pli auts. Uschia èsi vegnì fixà en il preventiv 2015 e concludì dal cussegl grond ch'il corp da la polizia chantunala vegnia augmentà per mintgamai 5 plazzas (missiva tar il preventiv 2015, p. 129) per furmar truppas d'acziun mobilas per cumbatter cunter la criminalitad sco er per rinforzar acziuns sistematicas da la polizia criminala e da la polizia da segirezza durant ils onns 2015 e 2016.

L'effectiv reglamentar da la polizia chantunala dal Grischun è vegnì augmentà – tenor l'infurmaziun da la regenza en l'ura da dumondas da la sessiun da favrer 2017 – da 469,4 plazzas l'onn 2015 sin 477,4 plazzas l'onn 2017 (PCG 2016/17, p. 771). Quai corresponda a las pretensiuns pli grondas envers las commembras ed ils commembers dal corp ed a las incumbensas pli e pli intensivas inditgadas gia en il rapport da polizia 2010. In'amplificaziun da las resursas personalas en connex cun il cumbat cunter la cybercriminalitad senza augmentar l'effectiv reglamentar da fin ussa da la polizia chantunala cuntrafeschess als conclus dal cussegl grond da l'onn 2015 e metess ulteriuramain sut pressiuin las commembras ed ils commembers dal corp ch'en gia oz chargiads fitg ferm.

Las sutsegnadras ed ils sutsegnaders dumondan perquai:

1. Cura è terminada l'amplificaziun en il sector da la forensica digitala, da la cyberinvestigaziun e da la cyberanalisa?
2. Quant aut è il basegn da personal supplementar da la polizia chantunala dal Grischun en quests secturs?
3. Vegn il cumbat cunter la cybercriminalitad amplifitgà sin donn e cust da l'effectiv da personal vertent (q.v.d. medem effectiv reglamentar) u vegni proponì en il preventiv 2018 d'augmentar correspondentamain l'effectiv reglamentar da la polizia chantunala dal Grischun?

Cuira, il 1. da settember 2017

Cavegn, Dosch, Michael (Donat), Albertin, Atanes, Bleiker, Blumenthal, Brandenburger, Buchli-Mannhart, Caduff, Caluori, Casanova (Glion), Casutt-Derungs, Caviezel (Tavau Clavadel), Cramer, Darms-Landolt, Deplazes, Dermont, Dudli, Engler, Epp, Fasani, Felix (Haldenstein), Florin-Caluori, Hitz-Rusch, Holzinger-Loretz, Jeker, Joos, Kunfermann, Lamprecht, Mani-Heldstab, Märchy-Caduff, Noi-Togni, Papa, Pedrini, Perl, Peyer, Pfenninger, Pult, Sax, Schneider, Stiffler (Tavau Plaz), Tenchio, Tomaschett (Breil), Troncana-Sauer, Vetsch (Pragg-Jenaz), von Ballmoos, Weber, Zanetti, Berther (Segnas), Cajacob, Costa, Föhn, Geisseler, Rodigari, Schmid, Sigron